

鐵菴省長哀輓錄

袁金鎧署



維

中華民國十六年十一月八日海陸軍大元帥張作霖致祭於  
前奉天省長兼財政廳長王君岷源之靈位前嗚呼岷源噩耗  
忽傳驚心動魄爲之慘然君才最長魄力亦大勞怨不辭氣能  
籠蓋爲我理財節流開源代握省篆事益殷繁綜核名實實事  
求是獨往獨來一任譽毀昭然成績裨余良多如左右手相倚  
匪他十年以來相從憂患盡瘁鞠躬諸事舉辦去歲懷歸卽云  
有疾敦促再三猶未肯出相違未久遽賦騎鯨哲人其萎慨念  
平生我欲哭 君事冗路阻飾終有典爲陳樽俎嗚呼尙

饗

維

中華民國十六年十二月七日

大元帥特派奉天政務廳長關定保致祭於

岷源省長之靈曰鐵山峯峻寧海水清鍾靈毓秀哲人誕生子  
諱忠誠伯輿治術華胄遙承賢才輩出典墳肆力庠序蜚聲學  
優則仕名動公卿昔在遼陽徼循屯侯討滑稽奸警夜巡晝轉  
輸饟饋整理度支蕭何劉晏無可加茲東道宣威北門坐鎮禮  
教振興庶民悅順方期作楫同濟大川如何奄忽竟損天年士  
失南鍼人傷國寶遙奠椒漿怒焉如擣尙

饗

維

中華民國十有六年丁卯十月望日袁金鎧以清酌庶羞粢盛之品致祭於亡友

王君岷源之靈前嗚呼岷弟遽賦騎鯨其不可復聞者吾弟之警歎其不能遂忘者吾弟之生平與君相遇院憶萃升重君節概磊落縱橫文藝旣出衆氣宇尤崢嶸金蘭訂契車笠結盟值庚子之判襪有拳匪之勢轟君棲藥市我練鄉兵荐君警校造就羣英並推辦警一鳴人驚嗣事機之齟齬又起君而歡迎三年成績獲奏帝京迨辛亥之政變復須君以有成軍械製廠警察開廳保安立會巡防練營府階晉秩參事前程鐵嶺收復卓



著能聲維民政之任命驟躋於簪纓一聞違語氣骨彌貞嘉君不苟氣節難更南金歸去月皎風清倏東邊之觀察又特拔於斯行下車伊始公正廉明偶兵變之波折持改革之權衡上峯不納所見君又拂袖而去露勁節之稜稜余以人才不可以廢棄也低徊宛轉屈君小就乃有遼康牛海省垣之樞局以劑絀而酌贏驀臨溟之秉政兼清丈於省城吏才卓越聲聞錚錚荷當道之特賞由刷新警務復担荷財政而繁鉅之驟撓省篆兼代力果心精森嚴壁壘孤危力撐其氣魄似張太岳之剛斷其經濟似唐劉晏之淵泓坐是懍威畏法咸惕惕於法令職權之內無敢爲弊竇之顯呈當時輿論其相推重者則曰此真不世

才也其詆毀者竟歸咎於推轂人以爲厲階所自并不予以荐  
士之美名時事日亟政見相爭翻然歸里靜掩柴荆揭心迹之  
所在慨然自見其性情三徵不出漠視干旌於是論者頓易前  
調咸欽佩於介節之超特卽當年數數推轂者亦若眞具知人  
之鑑而與荷殊榮嗚呼百年轉瞬孰不虛生況今者時事擾攘  
蜩螗沸羹妖星莫掃爲櫓爲槍君乃奄化木壤廈傾留名青史  
不徒犧牲其眞如君平日之所言死果無知一切作罷抑如吾  
之學說身雖死而靈不死是耶非耶恩耶怨耶因耶果耶歷歷  
不爽自有其可重與可輕尙

享

維

中華民國十六年十二月四日奉天省長劉尙清謹率所屬各  
官署全體職員以清酌庶羞致祭於

追贈勳三位國史館立傳王前省長岷源先生之靈前而言曰  
嗚呼東陲不幸摧茲長城白山慘照渤海寒鳴 公始弱冠蜚  
譽庠黌襟期月朗器量淵閎初試吏事已著能聲理煩治劇舉  
重若輕司覲掌禁安堵無驚治賦裕課屯田勸耕綜筭計政酌  
虛劑盈制用不匱歲入常贏省符兼領庶事修明任人選吏採  
鑑持衡布衣興衛杼柚縱橫經綸首創衣被蒼生樹人大計廣  
廈連薈英才樂育化洽莠莠交通文軌慘淡經營功同縮地效

邁兼程交隣有道壇坵敦盟折衝禦侮杜漸防萌帷幄翊贊體  
大思精寇公鎖鑰謝傅棋枰久勞軒冕暫解簪纓山中望重物  
外神清方期再起益懋勳名甲周末屆疢疾俄櫻朝陽落鳳大  
海騎鯨

元首震悼特示哀旌勳崇等秩傳紀生平邦人奔告痛失耆英  
樂碑羊社遺愛編氓凡茲寅窠夙荷陶成菲葑不棄葵藿同傾  
驚聞噩耗感泣交并人亡國瘁寧祇私情庶羞在簋清酌在觥  
靈兮來格鑒此丹誠尙饗

維

中華民國十六年歲次丁卯月建壬子壬戌朔越祭日癸酉奉



天紡紗廠總理孫祖昌協理韓岡岑謹以庶羞酒醴之儀致祭於

故省長岷源王公之靈前泣而言曰嗚呼哀哉翳公之德颯發  
火馳克明克類爲長爲師惟其能師乃克爲長誼存禮經昭來  
法往學宗漢宋志軼人天存順歿寧又何間焉陸游之詩虞翻  
之易懸出國門片羽尺璧中原未定景略先殂邦國殄瘁吾道  
其孤昔承公愛相期匡濟公歸兜率悲來無旣神兮何往魂兮  
何之噓氣成雲孰辨龍螭天地悠悠潛然泣下前無古人後絕  
來者嗚呼哀哉尙饗

維

中華民國十六年夏正十月望日奉海鐵路公司全體同人謹  
以素羞之奠致祭於

岷公省長之靈曰嗚呼胡不憖遺降此閔凶憂傷怛惻涕淚無  
從溯我東省滿目蒿蓬虎鷹四瞰荏苒葱蘢閭閻終寂府庫唯  
空民瘠弗療民氣何雄杞憂靡旣膚痛何窮自公來茲湛湛  
露斯爾甦爾蘇復潤復滋庶政未康公實理之黌宮旣圯  
公實葺之度支龐蕪公實厘之府帑弗充公實裕之工商  
未興公實倡之春回黍谷天下喁喁胡公勇退歸臥東山  
琴棋絲竹衡門永關雲霓延頸猶望公還公旣不出且列  
仙班千古永訣何以躋攀中原多難時事多艱哀哀黔首誰抱

痼瘵嗚呼

公去不復兮涼風淒其歔歔泣下兮有酒盈卮尙

饗

維

中華民國十六年夏正十月望日奉海鐵路理事長富維驥技  
術長陳樹棠總務課長袁嵩瑞工程課長張國賢車務課長高  
元策營業課長于善述謹以清酌素饔之奠致祭於

岷公省長之靈而弔之以文曰嗚呼我 公天縱之英幼承庭  
訓早掇科名約身守道茂德修行既孝既弟允恭允誠包洞典  
籍鈎奧契神傳經設帳誨善啓明旣而從政治警襄平荏苒滅  
景虺蜴潛形出宰渤海游刃武城賣刀買犢而民無爭爰整厘

稅利用厚生口碑腹鼓無不爾傾載歌載頌令聞永承乃弼元  
戎計勝操贏民物用阜庫廩以盛及長民政揆攬鈞衡德覃信  
孚葆大含宏懿我東北集粹含精山川間阻利何以盈乃興築  
路獨闢萊荆經之營之不日而成卓識偉略莫與之京勲績旣  
懋彪炳日星珠藏外耀功成不矜材張身退抱璞含貞雖在原  
野猶志澄清豈不再起霖雨蒼生胡不憖遺凋謝老成斯人不  
出竟赴九京嗚呼哀哉凡百君子咨痛罔極殷懷傷悼含涕流  
惻中原板蕩天下延息如何昊天喪我典則嗚呼泰山蒼蒼海  
水茫茫生也嶽嶽逝也堂堂金石簡冊竹帛旂常奠此杯罍來  
格來嘗嗚呼哀哉伏維尙饗



維

中華民國十六年歲次丁卯十月望日奉海鐵路總理王鏡寰  
謹以清酌庶饒之奠致祭於

特贈勳三位前奉天省長岷源王公之靈拜而言曰懿惟我公  
生有自來平準經濟藍華聿開治張巽渙令肅風雷盱衡政理  
中外交推繫余筮仕追隨達車道蔚師表器瞻國才翹節建志  
庶士康哉荆枳用翦莪樸宏栽冰壺咸仰金鑑無埃北辰東岳  
光明崔嵬政成東國泰際三台夷險一節厥德不回冠冕百僚  
峻厲風裁睠言路政實啓蒿萊交通暢達爲惠無涯致民聚貨  
利溥埏垓閭閻共式桑梓同懷何圖厄運木壞山頽蒼生霖雨

羣望竟乖九厚莫作靈閼泉臺南金雲黯徒系溯洄緬思盛業  
心顏爲摧國彫楨幹豈直私哀惟公有靈歆此罇疊尙饗  
維

中華民國十六年十一月越祭日三四方面軍團長張學良韓  
麟春遣代表察哈爾實業廳長劉效琨謹以清酒庶饒致祭於  
王省長岷源公之靈前嗚呼死生亦大矣世有生無益於社會  
死無動於人心者此庸衆人之生死烏足重輕哉若夫一人之  
生死動有關於國計民生之大一生一死誠非偶然已公稟天  
地清淑之氣生於南蘇爲瑯琊望族幼攻舉子業經史百家無  
不淹貫文彩紛披士林引重長以明經蜚聲賢路辦稅捐清田

賦任警務掌度支所至皆有政聲晚年出長奉省本其大有爲之志創辦新政造福桑梓勲名功績昭昭在人耳目間於以知天之生公非爲一身一家而生乃爲東省人民而生也當公之在位也革故鼎新興利除弊百姓日蒙其庥而不自知及其飄然遠引息影田園而東省之父老子弟遂日日望其再起東山以爲一再敦促而不允久之當有轉圜之意家居養病而不出將來或有出山之時而今已矣公逝矣人民之望絕矣嗚呼天殆不愛斯民耶胡不慙遺一老而忍令公之一臥不起耶故吾等不爲公之一身一家哭而爲東省之人民同聲一哭也謹遣代表備具祭品聊藉俚語以當哭嗚呼哀哉尙饗

維

中華民國十六年十一月越祭日

受業

劉效琨謹以香楮酒醴

之儀致祭於

岷源公夫子之靈前嗚呼夫子何竟溘然而長逝也謂夫子之體弱歟平素聰明強固精神內蘊迥異常人歷任稅捐清丈警務財政各要職理煩治劇措置裕如及就任省長萬幾叢於一身殫精竭慮昕夕不遑未嘗稍有惰容雖由於才智過人而氣體之強亦可於是徵之數年前雖患眼疾甚劇然一部份之痛苦究於全體無傷抑謂積勞所致歟辭職後退歸田里每日吟詩著書以自消遣優游歲月寬閒自在以視夫全省政務萃集



厥躬之際其勞逸自有別也然則強健者終無以臻上壽安逸時反難以享大年是何故歟此其中蓋有天命焉然而一言天命尤有令人不可解者閒嘗聞星者談夫子之命造均謂現行旺運幾至衆口一辭今何適成厄運竟一至於此也蓋所謂天者誠難知而數則不可測矣所謂命者誠難定而理則不可問矣謹奠酒漿以伸下悃 夫子其知也耶其不知也耶嗚呼哀哉尙饗

維

中華民國十六年十一月二十二日交通部次長代理部務常蔭槐謹以清酒時饌致祭於